



Kairos
NETWERK
- EENHEID in WAARHEID -

KAIROS NETWERK

info@kairosnetwerk.net

kairosnetwerk.net

4 APRIL 2023

KAIROS NETWERK: Verklaring van Kairos Netwerk oor amptelike advies teen die Koinonia Sinode wat vals en afbrekend is.

Die Sentrale Werkgroep van Kairos Netwerk (KN) het kennis geneem van kritiek oor die **beplande Koinonia Sinode** van Skrifgetroue NG gemeentes wat van 3-4 Mei 2023 by Ingwe Guest Lodge in Vanderbijlpark plaasvind en reageer as volg daarop:

1. Kritiek op kerkregtelike terme:

Die gebruik van bekende kerkregtelike woorde en terme in die skrywes en/of uitnodigings bevestig juis dat daar binne die kerk op 'n bepaalde kerklike wyse gehandel word. Kerkregtelike terme beperk en kategoriseer nie sonder meer kerklike samekomste nie. So het die woord "sinode" ook 'n wyer betekenis. Die Griekse woord waarvan dit afgelei is, het die betekenis van om mekaar op 'n plek te ontmoet en vandaar die pad verder saam te loop. Dit is juis die teenpool van vasgelooptheid wat 'n mens in 'n doodloopstraat laat.

2. Die bewering oor bindende besluite:

Dit is nie vir buitestaanders om te bepaal wat die aard en bevoegdheid van die Koinonia Sinode sal wees nie. In 'n gereformeerde kerk word alles nie vanuit die meerdere vergadering bepaal en gereguleer nie. KN gee uitvoering aan sy mandaat om verteenwoordigers van gemeentes wat tans doleer, asook ander behoudende en Skrifgebonde gemeentes, byeen te roep om saam oor die pad vorentoe te besin en te besluit. Besluite wat geneem word, sal aan die samestellende gemeentes se kerkrade vir bekragtiging voorgelê word. Dit is juis die teenpool van gebiedende besluite wat tans deur 'n algemene sinode vir gemeentes neem word, sonder dat gemeentes direkte inspraak daarby het.

3. Die foutiewe siening van geloofsbriewe:

Dit is nie waar dat slegs 'n ring, sinode en die Algemene Sinode aan die hand van geloofsbriewe konstitueer nie. Daar is genoegsame voorbeelde om die teendeel te bewys. Die destydse Dordtse Sinode is naas die gevestigde orde met geloofsbriewe, selfs uit ander kerke byeengeroep en het besluite geneem wat steeds vandag binne en buite die Nederlandse kerk bind en krag dra. Die teenpool is juis die huidige gebruik by sommige sinodes dat afgevaardigdes deur 'n taakspan aangewys word wat sitting met volle stemreg in 'n algemene sinode neem, sonder dat 'n geloofsbrief van 'n gemeente voorsien word. 'n Geloofsbriewe is die enigste waarborg dat dit nie net 'n paar individue is wat saam vergader nie, maar gemeentes wat amptelik verteenwoordig word.

4. Die stelling dat ander kerklike middele beskikbaar is:

Ongelukkig is alle ander kerklike kanale tans reeds verstop. Die kerklike middele wat die Kerkorde bied en waarna verwys word, is sedert 2015 reeds ruim beproef en loop telkens op niks uit nie. Slegs lede van die vergadering wat die besluit geneem het, kan kennis van revisie gee. Kerklike geskille wat aanhangig gemaak word, word nie ingevolge die riglyne daarvoor hanteer nie. Weens wysigings wat aan die Kerkorde aangebring is, is dit nie meer moontlik om prosedurele besware aan die Algemene Sinode self voor te lê nie. Dit is ook nie regtens moontlik om teen die afgelope Sinode se besluite beswaar te maak nie omdat die 21 dae tydperk om te appelleer reeds verstryk het. Die probleem is verder dat beskrywingspunte en beswaarskrifte wat op die korrekte wyse met motivering ingedien is, nie hanteer word nie, terwyl beskrywingspunte en voorstelle wat op onwettige wyse en sonder behoorlike kennis van revisie en motivering op die tafel geplaas word, die besluite van die vergadering word. By die wysiging van kerkorderlike bepalinge en die inwerkingstelling daarvan word die bestaande kerkorderlike voorskrifte nie nageset nagekom nie. Die teenpool is juis die huidige situasie waar lidmate, ampsdraers en kerkvergaderinge, wat nie gebruik maak van die kerklike middele wat die kerkorde bied nie, tog in kerkvergadering hulle sin kry.


5. Die totale wanbegrip oor die doel van die Koinonia Sinode:

Die ongevraagde verwysing na lidmaatskap, bevoegdheid, bates, eiendom en historiese verband sê eintlik waaroor dit vir baie gaan, terwyl dit vir KN wesenlik om die waarheid van die Woord gaan. Die advies dat uittrede uit die Algemene Sinode met 'n konsensus besluit geskied, sê dat aardse en tydelike sake die voorkeur moet geniet bo God se saak. Kerkorde Artikel 37 is 'n saak wat voor

God in die lig van sy Woord besleg moet word. Hieroor hang die tweesnydende swaard van die Woord wat lewend en kragtig en skerper as enige tweesnydende swaard is, en deurdring tot die skeiding van siel en gees en van gewigte en murg, en 'n beoordelaar is van die oorlegginge en gedagtes van die hart (Heb. 4:12). Maar die nou word daar 'n swaard van verbygaande en verganklike aardse goed gehang oor diegene vir wie dit 'n gewetensaak geword het om God meer gehoorsaam te wees as mense. KN en die meewerkende gemeentes en lidmate verwerp daarom aan die hand van die NGB Artikel 32 alle menslike uitdinksels en alle wette wat mense sou wil invoer om God te dien en om, op watter manier ook al, die gewetens daardeur te bind en te dwing. Slegs dit word aangeneem wat kan dien om eendrag en eenheid te bevorder en te bewaar. Die teenpool is juis die huidige on-Skriftuurlike besluite deur die Algemene Sinode geneem, gehandhaaf en selfs verder uitgebrei is, wat die mindere kerkvergaderinge en gemeentes verskeur en waarvoor daar geen inkeer en berou is nie, alleen maar net selfhandhawing en selfregverdiging.

6. Die taktiek van gogga maak vir baba bang:

KN doen gevolglik 'n beroep op lidmate, ampsdraers en gemeentes van die NG Kerk om hulle nie in hierdie kairos oomblik te laat afdreig nie, om getrou en enduit die Bybelse pad saam met gehoorsame en toegewyde medegelowiges te loop en om aan God Drie-enig al die eer en dank vir onverdiende genade en verlossing te gee.



Dr. Anton Knoetze
Voorsitter van die Kairos Netwerk